



Chhuah tan kum
- 1970 -

KRISTIAN THALAI

Kristian Thalai Pawl
Chanchinbu
Thla tin chhuak



VOLUME XVI

NO. 8

NOVEMBER

2025

ENG NGE THLAWK BO?

SERMON - *Rev. Zoramsanga*

ARTICLE

Faith Promise

-*Rev. Lalrinawma*

REPORT

25th PYF Biennial Conference
Cum Golden Jubilee Celebration

-*Joseph Vanlalhruaia*

ZIR BINGNA

Mizoram Sunday School
Union rawngbawna

-*Upa K. Zoremsanga*

AN CHANCHIN

Tim Tebow

-*Lalengkima Hnamte*

THALAITHE SUANGTUAHNA

Football leh Ringtu Nun

-*Joseph Lalrinliana*



PYF 25th Biennial Conference Cum Golden Jubilee, YRC, KṬP Delegates (2-5.10.2025)



PYF Organising Committee, CKṬP & Ṭhampui Pastor Bial



Zotlang, Champhai Br. KṬP Chanchinbu Emmanuel Silver Jubilee lawmna (29.09.2025)



KṬP General Conference Concert chanvo nei inhmuh khawm (07.10.2025)

KRISTIAN THALAI PAWL CHANCHINBU THLA TIN CHHUAK

Chhuah fan kum : 1970 | Kum 56-na | Kuminah vawi 11-na | Chhuah tawh zat : 564

Editor : P. C. Lalthanmawia

Joint Editors :

H. Zosangliana

T. C. Lalhruaitluanga

Lalruatpuia

Lalduhawma Chhangte

T. Upa Lalremsiama Khiangte

Vanlalremliana

Manager : Agnes Lalrinzuali

A lak man :

Kum khatah : ₹ 100.00

Copy khat : ₹ 8.33

Thu chhuah tûr nei chuan Editor, Kristian Thalai hnenah thawn tûr a ni a; la thar duh chuan KTP Office-ah hriattirin a man pêk lâwk tur a ni.

Editor Mobile : 8014697370

Manager Mobile : 8787480280

E-Mail : kristianthalai1970@gmail.com
centralktp@gmail.com

KRISTIAN THALAI PAWL



Thupui

Rawngbawl tûra chhandam

Thupui inngahna

Ephesi 2:10 : Thil tha ti atân Krista Isuaah chuan siama awmin, ama kutchhuak kan ni si a, chu thil tha tih chu kan awmma tûrin Pathianin a buatsaih lâwk a ni.

Thil tumte

1. Isua Krista rinna leh amah anna kawnga thalaite hrui.
2. Kohhran kut ke ni tura thalaite buatsaih.
3. Kohhran hnathawh tihpuitlin.
4. Krista Chanchin Tha puan darh.

A CHHUNGA THU AWMTE

1. Editorial	2
2. Sermon: Eng nge thlawk bo? – Rev. Zoramsanga	3
3. Article: Faith Promise – Rev. Lalrinawma	6
4. Thalaite suangtuahna: Football leh ringtu nun – Joseph Lalrinliana	9
5. Zir bingna: Mizoram Sunday School rawngbawlina – Upa K. Zoremsanga	13
6. An chanchin: Tim Tebow – Lalengkima Hnamte	18
7. Report: 25 th PYF Biennial Conference – Joseph Vanlalhruaia	22
8. Lamtluang: Thalai programme ruahman dan	26
9. Thalai huang: Expository Sermon entirna	28
10. Hringlang Tlâng	29
11. Kantu: Sesih Branch	30
12. Keimahni	31

COVER DESIGN

DAVID LALRINSANGA, DINTHAR BRANCH

INPUMKHAT A NGAI

Mizoram Presbyterian Kohhran chuan kumin Nilai leh Beihruah thupuiah 'Inpumkhatna' kan zir mek a, a hmawr pawh kan bawh hnai ta hle mai. Inpumkhatna hi pawl leh kohhran leh mi tin mamawh a ni a, kan rawngbawl honaah leh kan khawsak honaah phei chuan kan mamawh berte zinga pakhat a ni.

Pawl leh Kohhran pawh hi kan inpumkhatna tichhe theitu chu pawn lam atanga beihna ni lovin chhung lam atanga inbeihna leh inlungual lohna avang a ni ṭhin a. Lal Isuan "Khawii ram pawh mahni indo apiang an boral ṭhin; kawii khua pawh, chhungkua pawh, mahni indo apiang an ding chhuak lo vang" a ti a. Ram ropui tak takte, pawl ropui tak tak tluk chhiahna chhan pawh chhung lama inlungual lohna leh inphiarruknate, innghirnghona avangte a ni ṭhin a, ram leh pawl inpumkhat tlatte chu an ding chhuak ṭhin a ni.

Keini kohhran ṭhalai pawlte pawh hi kan inpumkhat tlat loh chuan kan rawngbawlnain hma a sawn thei dawn lo va, rah a chhuah thei dawn lo va. Pawl dang daih leh hmun dang daih a miten kan inlungualna leh inpumkhatna an rawn tichhe ngai lova, keimahni a chhunga chengte bawh hi inpumkhatna tichhe theitute kan ni. Kan inpumkhatna tichhe thei heng khakna te, thinurna te, tauhna te, anna te, inrel leh insawichhiahna te zawng zawng hi bansan ila. A theih phawt chuan keimahni lam tal, mi zawng zawng nen inremin awm ila, mahni aiin mi dang ṭhaah kan ruat ṭheuh a pawimawh hle.

Kohhran hmasate chakna pawh kha Ṭhlarau Thianghlim pawlna bakah an inpumkhatna leh thukhat vuaa an thawh hona kha a ni a. Kristaah phuar khawmin an awm a, Kristaah zung an kaih tlat avangin harsatna karah pawh an nghing ngai lo va, an rawngbawlnain rah duhawm tak a chhuah ṭhin a ni.


Editor

ENG NGE THLAWK BO?

(Thufingte 23: 4 & 5)



Sermon



Rev. Zoramsanga, UTC, Bangalore.

*“Intihausa tûrin intibah sub la, Nangma finna rin bâng rawh.
Thil awm lo chungah i mît i ngbat dâwn em ni? Sum chuan thla a insiam
ngei ngei a, Mupui vân lama thlâwk thîn ang hian.”
(Thufingte 23:4 & 5)*

Naupang hla anga kan ngaih, puitling tâna pawimawh zâwk hlei hlei si, ‘*Khawvêl sum tinrêng leh lunglu*’ hi hla ropui tak a lo ni. Naupan laia kan Sunday School zirtirtuten thu ða hla ða min lo vawntîr kha a lo va hlu êm! He hla hi Beginner Department kan nih lai aţanga kan sak tawh, a thu awmzia hriat chiana a hlutna zual tial tial a ni a. A thu tlar tin a mawiin a ril a; châng hnihna hian ngaihtuah a tithui zual a, kan Bible châng thlan, Thufingte 23 nêna inmil hle bawk a. Heng thu leh hlate hmang hian Pathian thu ngaihtuah ho ila a ða awm e.

Eng nge thlawk bo?

Châng hnihnaah chuan,

*“Khawvêl ropuina ka dîl chuan;
Sîrva ang a thlâwk bo ðhîn”*

tih thu kan hmu. Naupan laiin kan sa liam a; upat hnuah ngaihtuah zui tûr min pe a. ‘Eng nge thlâwk bo?’ tih zawhna rilruah a lo lût a; khawvêl ropuina kan ûm hian, chu khawvêl ropuina chu a

thlâwk bo nge Pathian Thlarauvin min thlawh bosan? ‘Mahni ropuina kan zawn hian Pathian Thlarau a hla tial tial’ tihna lam kâwk se a ril zual awm mang e, tih te rilruah a lo lut a. Mahse, a phuahtu tum tak a ðhelh thei a, chhui chian deuh a phu awm e.

He hla hi Welsh hla lehlin a ni a, Welsh mite zîngah chuan Calon Lân tia hriat lâa ni. A

thu phuahtu hi Welsh hla phuah thiam, Daniel James a ni a. Kan Kristian Hla Bua a thlûk kan hman hi John Hughes siam a ni thung. Mizo ṭawnga letlingtute hi Katie Hughes (Pi Zaii) leh Lalhlira te an ni.

Welsh ṭawng aṭanga English-a an lehlin dân version hrang hrang enin, he hla châng hnihna tlar hmasa pahnih hi a nih ang takin dah dân ıla, ‘Khawvel hausakna ka dil chuan, rei lo teah a chul thuai a’ tiin a dah theih âwm e. Mizo ṭawnga dahtute hian a awmzia bo si lovin, a thu mawi zâwk leh sak nuam tûrin an dah a nih hmêl.

Tichuan, a tira kan zawhna ‘Eng nge thlâwk bo?’ tih chu ‘*Khawvel ropuina te, hausakna te hi a thlâwk bo ṭhin*’ tiin kan chhang thei tawh ang. Chumi awmzia chu, khawvêl ropuina leh hausakna te hi a hlutna a chuai leh mai ṭhîn tihna a ni.

Thlâwk bo tûr ûmin kan hmanhlel

Lawng mi, tuifinriata kawng bote chu tui thianghlim in tûr an neih loh hnuah tui hâlin an thi ṭhin an ti. Tuin hual vel mah se tuifinriat tui al an in chuan, puar lung khawpin in pawh ni se an tui hâl a reh lo va, dang ro dang chârin an thi tho ṭhîn a ni âwm e.

Lei ropuina te, hausakna te pawh hi chutiang bawkw chu a ni. Mi hausain, “Ka hausa tâwk tawh e” an ti thei lo a, neih belh zel an duh a. Âwm leh mawi hmanga an neih belh theih loh hnuah âwm lo leh mawi lo thleng pawha sum zawn a ṭul châng a awm. Tûn hnai Mizorama thil thlengte ngaihtuahin, sum duh luatah Pathian leh ram dân pawh kan zah zo lo ta fo a ni âwm mang e!

A petu hre chungin, kan thil neihte a thu hnuai a dah chung a sum kan la khâwm a nih chuan a ṭangkaina a awm thei. Kan thawh rim rah kan seng hi Pathian pawhin a phal a; a phal chauh ni lovin kan mamawh thawk chhuak

ngei tûrin Pathian Thu chuan min zirtir. A petu theihngilha kan ûm erawh chuan a hlutna a chul thuai a, phurritah a chang a, hausakna hual vêl kârah thlarau rilţamna thlalêra vahvaih kan hma bâk a ni.

Pathian Thlarau ngei pawh kan hlat phah ţhîn

Sava hrâm mawi, *nightingale* hi bâwm chhûnga kan khung chuan, a bâwm mawi viau pawh ni se hlim tak leh mawi takin a zai zui thei tawh lo an ti. Zai ve pawh ni se a zaiin ‘tui hnâng’ a tlachham a ni âwm asin! Krista Thlarau pawh hi Krista a lalna hmunah lo chuan a zalên lo va, a hla daih ţhîn. Krista aia mahni hmasialna a tlâktlum zâwkna hmun – khawvel hausakna leh ropuinain kan rilru a luah len zâwkna hmunah Krista Thlarau hnaih a har.

Isua leia a awm lai khan khawiah nge a awm ţhin. Mi hnuaiahnung leh harsa zâwk bulah te, dam lo bulah te, thutak hriat châka thlarau rilţam bulah te, Pathian thua inpawlkhawmna hmun biak inah te, Pathian thutak avânga tuar a ţulna hmunah te a awm fo ţhîn. Vawiinah pawh hian chûng hmunah te chuan va kal ila, Krista Thlarauvin min lo hmuak ngeiin a rinawm. Kan thil neihte mahni intihnewmsak nân ni lovin Krista rawngbawl nân ni se, kan thiamnate mahni intihropui nân ni lovin Krista tân ni se, Krista Thlarau kan hnenah a awm ang. Chuta ta lo chhuak lâwmna leh thlamuanna chu a tlo ţhîn. Min thlawh bosan lo vang ●

FAITH PROMISE



Rev. Lalrinawma, FG&CC, Bawngkawm

Faith Promise thilpek hi eng nge? A Pathian thu (Biblical) em? 'Faith Promise' tih hi Mizo ṭawng chuan 'Rinna Thutiam' tihna a ni mai awm e. '**Rinna**' leh '**Thutiam**' a ṭang kawp a, chumi hmanga rawngbawlna chu a ni.

Faith Promise hi kohhran leh 'para-church' rawngbawlna tam takah hman a ni a. Kan pek ṭhin pangngai (*regular offering*) nena a danglamna chu; neih sa awm lova Pathian rinchhana pek sawi mawiin, chumi atana 'rinna/rinngamna' sawi pawimawh a ni ṭhin.

Faith Promise rawngbawlna hi kum zabi 19-naa Canadian thuhriktu lar leh Christian and Missionary Alliance (CMA) dintu A.B. Simpson-a bul ṭan nia sawi a ni. Simpson-a inngahna chu, "Kan tehna ṭawk liama mi, mi dang thawh rimte chu kan chhuang lo va; in rin a ṭhan angzia zelin, kan bial chin ang zelah, in zingah nasa taka tihlenin kan

awm ang tih beiseina kan nei zawk a, buatsaih sa kawng thuah chuan mi dang bial chhuang lovin, in piah lam ram thleng pawha Chanchin Ṭha kan hrilh theih nan," (II Korinth 10:15-16) tih hi a ni. Kohhran ṭhenkhat chuan II Korinth 8&9 hi ṭan chhanah an hmang bawk.

Sapho zingah he rawngbawlna hi an lo uar hle mai a; a bikin ramthar rawngbawlna (mission) lam hawiin an kalpui ber. Kohhran ṭhenkhat chuan thla tin Pathianni vawi khat hi Mission Sunday emaw, Faith Promise Sunday emaw tiin an serh hrang a; a ṭhen chuan Faith Promise pualin Ip (envelope) an

siam bawk a. Thawh tur zat (budget) intuk zawnga kalpui pawh an awm. A tlangpuiin kum khat atan zel an ruahman thin.

Westminster PCA chuan hêng châng, II Korinth 8 leh 9; I Chronicles 29:14,16; Luka 6:38; Malakia 3:10; Sam 37:5; 2 Chronicles 9:6 te hi la chhuakin, innghah nan leh tan fungah an hmang deuh bik a. Khawthlang (Sap) hoten an kalpui dan leh an sawi danah chuan, 'thutiam' tih hi 'Pathian thutiam' an kawhtir deuh ber a, "Bible-ah Pathian thutiam tam tak kan hmu a. Amah leh a thutiam ring ngamte tan chuan malsawmna dawna pawh a ni. Heng Pathian thutiamte hi ring ngam chungin, rinnain kan pe tur a ni," an ti a ni deuh ber mai.

Toronto-a The People's Church dintu, Oswald J. Smith-a chuan, "Faith Promise Offering hi Pathian thu anga thilpek kan pekna (Scriptural Offering) a ni a. Rinnain i pe (Faith Promise Offering) thin nge, pawisa awm

sa i pe mai (Cash Offering) thin?" tiin FPO leh CO hi a thliar a. "CO-ah chuan ipte kan zen a, kan phawrh a, kan pe mai; tawngtai leh Pathian rin thar chiam a ngai lo; FPO-ah erawh tih tak zeta tawngtai a ngai. Kum 25 rawng ka bawl chhungin FPO hlirin ka kal a. Annual Mission Convention-ah pawh CO chuan \$7000 bak kan hmuh ngai loh laiin, FPO-ah chuan \$25,000 chuangte kan hmu thin." tiin mipui a cho thiam hle.

Hetih lai hian Baptist kohhrana missionary thin fapa, Wayne-a, Oswald J. Smith-a te nen pawha kohhran thuhmuna lo awm tawh thin chuan, "Smith-a te hian KJV an hmang a. A thu hrimin an Bible chang hman lar, 2 Kor 8:1-5 leh 9:1-9 hi Paula'n mi thianghlimte tlakchhamnaa an mamawh puhru tura a ngenna a ni a, heti zawnga hman vek hi a rem lo" tiin a sawisel ve thung. Eng pawh ni se, khawthlang lam chuan an kalpui vung zawk khawp mai a. 'Faith Promise

Church' hial dinin, an inkhawm hmasa ber pawh Feb 5, 1995 khan, Oak Ridge, Tennessee Hotel-ah mi 350-in an lo nei daih tawh a ni.

Keini lamah chuan Pathian thutiam ai mahin, 'rinnaa pe tura keimahni intiamna' lam kan sawi pawimawh deuhin a lang. "Engzat nge i intiam theih dawn?" tia inzawh pawh kan ching hle. A rawngbawlna kalpuitute pawh KṬP leh Kohhran Hmeichhia an ni ber a, Pavalai Pawl hian thawktu an chawm chuan an han ti ṭan ve ta bawk a. Kan tinzawn ber pawh mission rawngbawlna tho a ni.

Sap ho kalpui ang taka ropuiin ti lo mah ila, kan rawngbawlna peng tin hi 'rinna' nen lo chuan thawh chi a ni lo va; a inthlun zawm vek bawk.

Kan kohhranina kan rawngbawlna pawimawh tak 'Sawma-Pakhat' hi pawisa hmanga kan rawngbawlna, rinna hmanga kan thawh, chhungkaw

tam takin 'thutiam' nena ṭangkawpa an thawh mek a ni. Hei bakah hian thawktu (missionary) chawmna, thla tina ₹ 1,000 pea kan thawh hi, Pathian rinchhanin kan ti deuh fur bawk. Sap hovin 'Pathian thutiam rin ngam' an sawi uar lain, keini chuan 'Pathian ring chungma mahni intiamna' lam kan sawi uar thung.

Pathian rinawmna lam chu Bible-ah hai rual lohvin a lang a. Entir nan, '*Thutiamtu chu a rinawm si a'* (Hebrai 10:23) tih leh '*Pathian zawng a rinawm a ni'* (IKorinth 10:13) tih ang te hi. Keini hi kan rinawm ve em tih lam hi infiah fo chu kan mamawh ang.

Faith Promise rawngbawlna hi kan rinna tichaktu leh Pathian min hnaihtirtu ṭha tak, rawngbawlna hlawk tak a nih laiin, uchuak taka inzirtir theih a nih avangin, fimkhur taka kalpui zel erawh a ṭul deuh deuh dawnin a lang ●

FOOTBALL LEH RINGTU NUN



Joseph Lalrinliana , Electric Veng, Khawzawl

Ringtute hi rinnaah kan awm nge awm lo infiah thin turin Bible in min zir tir a, eng anga awm tur nge kan nih, eng ang ringtu nge kan nih a, kan ringtu puite nen hian eng anga thawk ho tur nge kan nih tih hi *football* hmangin sawi kan tum dawn a ni.

Game khelh dan

Football chu awmze neia khelh thin a ni a, a inkhel turte chu an khelh dan tur ruahmanna siam sa mumal tak hmangin game an khel thin. Game-ah chuan khelh dan langsar zual chi hnih a awm a; *attacking game* leh *defensive game* a ni.

Attacking Game-ah chuan goal thun tumin an tumpuite chu awmze neiin na takin an nawr a, taima takin an khel a, goal pawh an thun nge nge thin a, an game pawh a hmuhnawm a, hnehna chan pawh a awlsam thin. Defensive game-ah chuan, an lama goal a luh loh nan theih

tawpin an lo inveng a, lehlam goala thun aiin an lama goal luh tir loh an tum thin a, chutiang chuan inveng reng rengin game an khel a, an khel a hmuhnawm lohva, a ninawm hma em em a, goal thun pawh a har a, a tlangpuiin chak lo zawkah an tang duh viau bawk. Dawihzep game, tiin an sawi thin.

Chumi game chi hnihah chuan ringtute engtin nge kan awm ang? Kan duh emaw duh lo emaw Setana nen hian kan inkhelh reng avangin ringtute hian attacking game kan khel ngam tur a ni. Engtin nge Setana lakah hian ka chak theih ang,

engtin nge goal ka score theih ang tih hi kan ngaihtuah dan tur a ni. Setana hi awmze neiin, na takin kan nawr ang a, theihtawp chhuahin taima takin kan bei ang a, Pathian ṭanpuinain hnehna kan chang ngei dawn. Chutiang ni lova Setana laka defensive game kan khelh a, ṭlan chhe reng reng leh inveng reng renga kan awm vaih chuan setana hneh theihna chance hi kan nei tlem hle a ni. Bible chuan Diabola hi hmun kian lo tur leh dodal turin min zirtir a, kan do dal loh a, hmun kan kian a nih chuan he inkhelhnaah hian a chak lo zawk kan nih a hlauhawm. Tunlai hunah ngat phei chuan Pathian dan ang tak leh mumal taka setana hi a beitu zawka kan ṭan a pawimawh tawh hle. Chutianga sual bei ngam ringtu chu kan nih a pawimawh.

Players ṭha

Football-ah chuan position hrang hrang a awm a, *keeper*, *defence*, *midfield* leh *forward*-te a ni, chutiangah chuan players

ten mahni position ṭheuhah an khel ṭhin a, players mal tinten an position-ah tih tur mumal takin an nei ṭheuh ṭhin. Players ṭhenkhat chuan chung an tih tur chu an hlen chhuak thei lova, chutiang chu players chhia an ni. Players chhiate chu an team-ah hmun an chang tam lo tial tial a, a tawpah team aṭanga hralh chhuah an ni ṭhin. Players ṭhenkhat erawh chu an position-ah an tih tur dik tak ṭha takin an hlen chhuak a, chungte chu players ṭha an tihte chu an ni. Players dang leh chuan an position-a an tih tur ṭha taka an hlen chhuah mai bakah, an ṭhiante, an teammate-te tih tur an va tih kep/tisak tel thei a, an khelhpuite ṭhat tawk lohna leh tihsualte an va siamṭha tel thei a, chungte chu player ṭha bikte an ni.

Player ṭha bikte chuan chutiang an tih theih avang chuan team pumpui ti chaktu an ni a, an mahni avangin kha team kha ṭha takin a kal thei a, mi tam tak

hmuhah langsar takin awm lo mah se, team-ah an awm loh a hriat thin hle a, team pumpui khaidingu an ni thei thin a, team-te hlawhtlinna chanpuitu pawimawh tak an ni thin. Chu chu ringtu nunah a pawimawh khawp mai.

Pawl anga Pathian rawngbawl naah hian a pawimawh zual. An tih tura ruat tha taka hlen chhuak thinte hi rawngbawltu tha pangai an ni a. Rawngbawltu tha bik erawh an ni phak lo. Rawngbawltu tha bik chuan an tih tur tha taka an hlen chhuah mai bakah an rawngbawlpuite tha ti chaktu an ni tel thei a. An rawngbawlpuite chak lohna dawm kangtu an ni a, mi tam tak hmuhah langsar in hmingthatna an tihtheih tawk pawh an tihlawhtling peih lova, an rawngbawlpuite tan harsatna leh natna an thlen fo va, an phunchiar duh phian a, sawisel tur an hre theiin, an telna pawl tan buaina thlentun an ni fo thin.

Team work

Football chu *Team work* a ni a, mahniin tu mah an inkhel ngai lo, a huhua khel thin a ni a, team angin, lungruah takin an inkhel thin. Team inlungruah leh inpumkhat thaah chuan players tha ber ber awm khawm lo mah se, hnehna an chang thei mai thin a. Team boruak chhia, inpumkhatna that lohnaah chuan player tha pui pui awm khawm mah se, hnehna chan a harsa em em thin.

Team anga hnehna chang tur chuan team inlungruah leh inpumkhat hi a pawimawh em em a ni. Chutiang chiah chu ringtu nun pawh hi a ni. Mal tlat ngaihna kawng tam taka awm thin mah se, huho anga rawngbawl na hi a tam em em a, tunah pawh KTP-ah team angin Pathian rawng kan bawl ho mek a ni. Chuta pawimawh em em chu inpumkhatna tha hi a ni.

Sual dona kawngah hian inpumkhat that a ngai em em a,

ringtu hmasate pawh kha inpumkhat ṭha takin Lal Isua rawng an bawl ho ṭhin tih kan hria. Setana hlauh ber pawh ringtute kan inpumkhat hi a ni. Kan inpumkhatna tichhe turin theihtawp a chhuah bawḵ ṭhin. Lal Isuan khawvela a hun a hman zawh dawn khan Pa Pathian hnenah a ṭawngṭai a, tah chuan amah ringtute hnenah thil pakhat min dilsak a, khawvel hausakna, thiamna leh finna te, hmingṭhanna te, hmingṭhatna te, chawimawina leh nawmsakna min dil sak lo, Lal Isuan a pa hnena min dilsak chu; ***pumkhat an nih theih nan***, tih hi a ni. Chu chu Lal Isuan amah ringtute kan nun honaa a duhthusam a ni. Pumkhat kan nih chuan hnehna kan chang dawn tih a hria a, chu chiah chu Setana pawn hian a hriat ve bawḵ avangin, kan inpumkhatna chu a theih dan kawng tinrengin tih chhiat a tum ṭhin a ni. Mahniin eng vak mah ni lo mah ila, ringtu ṭha leh ropui

tak ni loin; ringtu chak lo ve tak tak awm khawm pawh ni ila, kan inpumkhat ṭhat tlat chuan kan chak lohna zawn te teah indawm kang tawnin kan inti chak tawn ang a, hnehna kan chang mai dawn a ni. Kan inpumkhat ṭhat loh erawh chuan ringtu ropui leh chak tak tak awm khawm pawh ni mah ila, zawi zawiin kan intichhe tawn ang a, Setanan min hneh vat mai dawn. Chu chu hre rengin khawvelah hian ringtute hi i inpumkhat tlat ang u, ti chuan setana lakah hnehna kan chang thei dawn a ni.

Tlangkawmna:

Kan Bible tar lanah khan rinnaa kan awm leh awm loh mahni ngei inchhin ṭhin turin min hrih. Kan vela mite chhin turin min ti lo, keimahni ngei hi inchhin turin min ti a ni. Heng kan sawi takte aṭang hian keimahni ngei hi eng ang ringtu nge ka lo nih a, eng ang ringtu nge ka nih ang, tih hi inngaih tuah thar leh ṭheuh ang u ●

MIZORAM SUNDAY SCHOOL RAWNGBAWLNA



ZIR BINGNA

Upa K. Zoremsanga

Khawvela School tha ber leh ropui ber tia an sawi thin - *Sunday School* chanchin hi chip chiah taka sawi tur chuan hun leh hmuna duh zau dawn a, chuvangin tun tumah hian Mizoram bika Sunday School rawngbawlna chanchin tlangpui kan thlir ho dawn a ni.

A bul tan dan a dik

Mizorama Missionary lo chhuak hmasa zing a mi leh Welsh Kohhran Missionary hmasa ber, Rev. DE Jones (Pu Zosaphluia) chu August ni 31, 1897 (Ramthar Ni)-ah Mizoram a lo thleng a. Zirna lama mi tui leh ngai pawimawh tak a ni. February ni 15, 1898 (Thawhlehi)-ah school dina zirtirna bul tanin, February ni 20, 1898 (Pathinni) khan Mission Venga Hriang mual/tlang an tih (tuna Zosaphluia building dinna) hmuna hian Sunday School a din ta a ni.

Khawvel ram danga Sunday School dintu leh bul tantuten naupang atangin bul an tan tlangpui deuh zel a. Khawvela Sunday School bul tantu leh dintu, Sunday School Pa ti hiala koh Robert Raikes chuan July, 1780-ah England ramah naupang atangin bul a lo tan a. William

Carrey chuan 9th July, 1803-ah naupang atang bawka bul tanin India ramah Sunday School min dinsak a. Chutiang chuan Missionary-te pawhin naupang atangin bul an tan deuh theuh mai. Mizoram-ah erawh chuan, puitling, naupang leh hnam dang (Masihi Sangati) ten February ni 20, 1898 (Pathinni) khan a rualin ni khat thil thu-ah Sunday School kai tanin Pathian thu an ngaithla nghal theuh hi Mizoram kan danglamna tak a ni awm e.

Sunday School din tan lai hian Mizoramah ringtu pakhat mah an la awm lova. Tichuan, heng Sunday School kai hmasate hi ringtu hmasa leh Chanchin Tha puang darhtu pawimawh tak an ni nghal zel a, chumi avang chuan kum rei lote chhungin Kristian ram, tih ngam kan lo ni ta reng a. Tunah pheh chuan Mizoram chu kohhran ropui tak, khawvela Sunday School lian leh tha ber

neitu zinga an sawi kan lo ni ta hial a ni. Heng zawng zawng hi a bul ṭan dan a dik vangin Pathian malsawmna kan dawng, ti ila kan sawi soal lutuk awm lo ve.

Hma a sawn zel dan

Mizoramah Kristian kan lo pung ve hret hret zel a, kum 1911 chuan Pathian thu awih mi 2461 lai kan lo ni ve ta. Khaw ṭhenkhatah sikul a ding chho va, chung khuaah te chuan Sunday School a ding ve nghal deuh zel bawk a, chu chuan nun hmasawmna kawng tam tak a keng tel zel a, a lawmawm hle a ni. Kum 1911-a Kristian Tlangau (Krista Tlangau) lo chhuak chuan Sunday School zirtirna kawnga kaihhruainate a chhuah ṭhin avangin a ṭangkai hle mai. Inkaihhruaina mumal tak a la awm loh avangin Kristian Tlangau hmu pha kohhrante chuan an theih ang angin an lo zir ve ṭhin a, hma a sawn tir hle a ni.

Kum 1917 khan Rev. FJ Sandya (Pu Dia) hovin India Sunday School Union (ISSU) zawm a lo ni ve ta a. Hemi kum vek hian ISSU hriatpuiin exam pawh neih a ni ve ta hial a, hei hi Mizoramah Sunday School exam kan neih ṭan kum a ni ta a ni. Pawla inṭhen fel a la awm loh avang erawh chuan puitling leh naupangin an ti ho mai

ṭhin. Kum 1924 khan Mizoram tana Sunday School Nu tih mai tur, Mrs Kattie Hughes (Pi Zaii) a lo thleng a, a ni hi kan tun dinhmun min hruai thlengtu pawimawh tak a ni. Pi Zaii ṭhahnem ngaihna leh zirtirna avangin pawl (Department) hrang hranga inṭhen (Graded Sunday School) hi nei kan ni. Kum 1931 khan Zoram Sunday School Zirtirtu Conference chu Aizawl-ah koh a ni a, Graded chungchang sawi ho a ni a, '*A theih chin chinah neih ve ni se*' tiin lungruak takin thu tlukna an siam a, Graded Sunday School chu kan nei chhonzawm ta zel a ni.

Ni 20 February, 1935-a Assembly Sunday School Committee ṭhu khawm thurel No. 5 chuan, '*Lushai Sunday School Union lo nei tawh ila kan ti*', tiin a rel a, chuta ṭang chuan LSSU chu ṭha takin a ding chho a. A din aṭanga kum 20 hnu 1955-ah Mizo Sunday School Union (MSSU) tia hming thlak in tun thlengin kan pu chho ta zel rih a ni. Synod insingsakna ang zela kal chhovin, tun hmaa General Secretary nei hrang ṭhin pawh chu, kum 1974-a a hnunung ber Upa Liana chawlh hnu aṭang chuan Executive Secretary i/c MSSU tia thlak lo ni ta-in Rev. Ronghinga chu he hmun luah hmasa bertu a ni.

Zirlaibu lam pawhin hma a sawn chho zel a. A din tirh lai chuan Mizo Ṭawng Bible hmuh tur a la awm loh avangin, Missionary ten Bible thu hrang hrang *note*-a an siam chu zir a ni mai a. Zirlai mumal deuha neih hriat theih hmasa chu, 1920-a ‘Chanchin Ṭha Matthaia Ziak’ an zir chu a ni mai awm e. Puitling lam zirlaibu chu a tir aṭangin kan Zosapte leh kan mithiamten an buatsaih ṭhin a, chu chu tun thleng pawha kan kal dan a la ni. Naupang lam zirlaibu hriat theih hmasa chu 1923-a, ‘Isua Tehkhinhute’ tih a ni. Chumi hnuah Pi Zaii’n kum 1930a British Graded Sunday School zirlai zulzuia a buatsaih chu hman a ni leh a. Kum 1932 aṭang khan ISSU zirlaibu chu Mizo ṭawng lehlin phalna lain lehlin a ni a, kum rei tak chhung hman a ni. Mahse kan zia nena inmil tur keimahni irawm chhuak ngei zirlaibu neih ve chu MSSU chuan ṭul a ti hle a, kum 1980-ah Zirlaibu Committee a din ta hial a. He Committee hmalakna hian Lesson Plan te siamin zirlaibu buatsaih hna a thawk nghal a. Kum 1983 aṭang chuan keimahni kut chhuak liau liau zirlaibu kan lo hmang ve thei ta a ni.

Training leh Seminar

Training leh Seminar-te hi engtik hun lai aṭanga intan nge, Eng tiang takin nge hun hmasa lamah khan an lo neih ṭhin tih hriat chian a har tawh hle. Kum 1953 hma lamah khan training hi neih a lo ni tawh ṭhin tih erawh a hriat theih. Kan Zosapte leh mithiam hmasa ten khaw fan paha an fuih leh hrilh ṭhin te, Bible chhiar thiam hmasa ten mi dang an zirtira an ṭanpui zelte chu hmalakna hmasa a ni mai awm e. Kum 1937-a Committee ṭhu khawmin training an ngaih pawimawh thu an tar lan aṭangin ngaih pawimawh a hlawh ta hle a. Kum 1956 khan Aizawlah trainingna hmun in sain kum tin ṭum hnih training koh ṭhin a ni ber a, Sunday School-in a hlawk phahin a ṭangkaipui hle. Amaherawhchu, kum 1966-a ram a buai khan thil tih a buaithlak ta a, a in pawh a lo rawih zo ta a ni.

Tunah chuan, Synod Office lama thawktute leh mithiam bikte kal chhuakin a theih ang angin kohhran mal leh bialah te Zirtirtu Training neihpui a ni ṭhin a, hei hi a ṭangkaiin a hlawk hle.

A pawimawhna

A pawimawhna hi sawi tur a tam hle. Sunday School-in a tum ber chu rilru leh thlarauva mihring siam puitlin a, Kristian tia koh tlak nungchang nei tura ṭanpui leh chher chhuah a ni. Mihring nunah hian tisa leh thlarau nun inbuk tawka ṭhanna (balance growth) hi thil pawimawh tak a ni a. Chu kan thlarau nun chawm sei lian tur atana pawimawh tak chu Pathian thu ngaihthlak leh hriat a ni. Pathian thu ngaihthla rual vek kan ni a, a ngaihthla turin naupang lutuk a awm theih lova, upa lutuk lah a awm theih hek lo. Mi tinin Pathian thu kan ngaihthlakna hmun chu Sunday School hi a ni a, min khaikhawm vek a, huapzo school a ni. Chuvang chuan mihring nun chher puitlinna hmun ti pawhin kan sawi thei ang. Sunday School hian thil tum paruk (6) a nei a, chungte pawh chu ngun taka kan zir chuan mihring nun chher puitlinna kawng an ni vek mai.

Khawvel hmasawwna a zuanin a zuang a, zirna, sum leh paia intlansiakna, media leh سوالنا chi hrang hrangin min tibuai reng a, it tur leh aw h tur a pung tual tual a, kan nun tibuai thei a tam tak em avangin chhungkaw eng emaw zat kan rum a, Pathian thu kan ngaihsak hman ta meuh lo. Chutih

laiin Sunday School rawngbawlna erawh chu a ngaiin hma lam panin a kal zel a. Hmasawwna kawng lam kan thlir chuan lawmna tur pawh a tam e. Chuvangin, keini kohhran chuan Pathian thua inchawm seilen zel ṭulna hriain hun ṭha lai ber kan pe a, waviin thlengin kan inkhawm tamna ber pawh Sunday School a la ni zel hi a lawmawm hle a ni. England rama kohhran hruaitu Mizoram rawn tlawha kohhran chanchin zir Chiangtu Mark Oxbrow chuan, ‘Naupan lai ṭanga Pathian thu zir (Sunday School) in ngaih pawimawhna leh nemnggeh loh mite rawngbawlna (Lay participation) in hman ṭangkai thiam avangin Mizoram Presbyterian Kohhran hian chhiat lam aiin pun leh ngheh lam in pan zel ang’, a tih hian a sawi thui hle mai.

Sunday School rawngbawlna hian arbawm chhe kang ang maia wavi leh khata rik hlui hi a tum a ni lova, thingchang mut anga zawi muanga mut chhova siam ṭhat leh ngheh tir a tum a ni. Ṭha taka Beginner ṭanga Senior kai chhuak, puitling Sunday School kai chho zel te chu ngheh pawh an nghet tlangpui a, rah an chhuah nge nge ṭhin. Edward Kimballa Sunday School rawngbawlna

chuan kum 1855 daih tawhah khan DL Moody a chher chhuak a, chutah chuan tawp mai lovin khawvel huapa rawngbawltu hmingthang leh langsar Frederick B Meyer, J.W Chapman, Billy Sunday, Mordecai Ham leh Billy Graham te a chher chhuak zel a, a hnu zel pawh a la awm ngei ang.

Heng bakah hian Pathian biak kan inzirtirna hmun pawimawh a nihna te, *'Pathian chu Thlarau a ni; a chibai bukuten thlarau leh tih tak zetin chibai an buk tur a ni'* tih a taka kan neih zel theihna tura min hruaitu a nihnate hi hriat reng a pawimawh. Kan kohhran a ngheh zel nana kan Thurin inzirtirna hmun pawimawh a nihna te pawh. Lungtual tak leh inpumkhata kan chen ho zel theih nana khua leh tui tha nihna tur kawng kan inkawhhmuhnate hi hmuh hmaih phal chi a ni lo vang.

Sunday School hi mihring chher puitlinna hmun a ni kan tih mek lai hian, Hruaitu tha nihna (leadership) kan inzirtir (training) na hmun a nihnate hi kan hriat reng a pawimawh hle. Beginner naupang (kum 4/5) inñanna hun hmanga mi hmaa ding ñan tan chuan, puitlin hnu mi hmaa din a harsat tawh lo vang a, hruaitu tha leh rawngbawltu thaah a

chhuak nge nge ñin. Naupan lai aña Sunday School kai tha leh tha lo chu puitlin hnuah danglam hmuh tur a awm thuai ñin a, rawngbawlnaah kohhran kalphung hriat kawngah thlengin an inthlau hle ñin a ni. Chuvangin, rawngbawltu tha chher chhuahna hmun niin kohhran kui ñahna hmun a ni tiin kan sawi thei ang. Sunday School kai tha leh kai tluantlingte chu jail tang an tlem nge nge an tih pawh hi thu dik ngei niin a lang.

Sawi tur tam tak awm karah, zai zirna hmun a ni te hi a pawimawhna ti zualtu a ni awm e. Pathian chu kan awa fak tur kan ni a, naupan tet aña puitlin thlenga kan zai hian kohhran a tinunga, hma min sawn tir a ni. Mizo zai thiamte hi a tlangpuiin Sunday Schoola zai bul ñan an nih fo avangin, Sunday School hi titawp ta ila zaiah kan tlahniam sawt ang tih a rinawm a ni. A pawimawhna dang kan thlir zau hman tawh lo ang a, Nungchang mawi leh tha kan inzirtirna hmun a ni te, thilsiam dangte enkawl leh hmangaih kan zirna hmun tha a ni te, Pathian hnena thilpek kan zirna hmun pawimawh a ni te hi hre chhunzawm zel ila, Sunday School rawngbawlna hi ngai hlu zual zel ang u ●

TIM TEBOW



Lalengkima Hnamte, Ramhlun East Branch




Timothy Richard Tebow hi August 14th, 1987-ah Makati, Philippines-ah a lo piang a. A nu leh pa; Bob leh Pam Tebow te chu Philippines-a missionary ni turin 1985-ah an inpe a, fa pali lai an neih hnua inpe chauh an ni a, chhangchhiat pawh an chhangchhe hle a ni.

Pam-i hi Tebow-a a pai hma chiah hian santen natnain a tlakbuak hlauh mai a; he a natna hi a la na hle mai a. Damdawi chak tak taka enkawl a ni a, a dam chhoh mek lai chuan a rai a ni tih an hre bawk a, lawm hle mah se doctor-te chuan chanchin duhawm lo tak mai an hrilh a. A naute pai chu a natna leh damdawi nghawng avang chuan thia pian chhuah beisei a ni; chumi avang chuan naute chu tihtlak mai a ṭha tiin doctor te'n thu an rawn a ni. Chumi avang chuan a nu nunna atan a pawi thei dawn a ni tihte pawh an hrilh bawk a ni. Nimahsela, Tebow-a nu leh pate chuan naute chu an rinna avangin

tihtlak an duh lo hulhual a, naute chu pai tlang a tum ruh tlat. Tichuan, kum 1987 August 17-ah chuan Tim Tebow chu hrisel taka rawn piangin Pathian thiltihtheihna ropui tak an hmu ta a ni.

Tim Tebow chu a tet lai aṭang rengin a nu leh pa ten Pathian thu vawntirin, Kristian rinnaa ṭhang lian turin an enkawl nasa hle a. Kum 6 chauh a nihin Lal Isua hnungzui tura inhlanin a Lal leh chhan-dam-tuah pawmin, a nu leh p a t e hriatpuina ngeiin a puangchhuak ta a ni.



Tim Tebow chu University of Florida-ah kalin American football history-a *college quarterback* ngaihsan leh sawi hlawh ber a lo ni chho ta a. College a kal chhung hian Heisman Trophy 2007-ah a dawng a, National Championship-ah vawi hnih chakin, record tam tak a siam nghal nghe nghe bawk. Kum 2010-ah National Football League-a team pakhat Denver Broncos chuan an player ni turin an la ve hlauh mai a, a luh tirh lamah danglam hmel viau lo mah se, season hnihnaah chuan an quarterback rinrawl ber a ni ta der mai a, a thawhrimna avang leh a nun a invawn em avangin player entawn tlak leh zah kai a ni chho nghal vat reng a ni. Tebow hian inkhel tura field an luh hma hian field sirah thingthiin a tawngtai thin a, chu chu



a chin thin dan a ni a. A thiantie'n a tihdan chu hming phuahsakin 'Tebowing' tiin an kohsak a, tun thleng hian a lar phahna pawh a ni reng a ni.

Kristian thalai kan nihna hian kan chhehvela mite'n kan nunah hetiang tak hian kan kristianna hi an hmu ve thei em tih pawh hi inzawh tham tak a lo ni ta a ni. Thil tih ho nikhuuaa tawngtai rawt chhuaktu nih te hi zahthlakah kan ngai chho ang tih te pawh a hlauhawm chho ta hle mai. Tim Tebow ang hian theih ang angin kan nunah kristian thalai kan nihna hi lanchhuahtir i tum ang u. Nimahsela kan hmingthatna tur ni lovin, Lal Isua chawimawia a awm theih nan ni zawk rawh se. College-a American football a khelh lai atang tawh hian Tebow hian a biang ding lam leh vei lamah hian Bible bung leh chang ziah lan a lo

ching tawh ṭhin a, a ziah lan zin ber chu Philippi 4:13 a ni. Merchandise siam ṭhin ho pawhin a awmzia hre chuang lovin, Philippi 4:13 tih ziaak chu Tim Tebow-a ziahlan ṭhin a nih avang hrim hrim chuan thil chi hrang hrangah an lo chhu kai ṭhin a, han lar hluai erawh chu a la ni hrih lo.

Kum 2009-a National Championship Game an khelhdawn hnaihin Johana 3:16 a bianga ziah lan chu a lang ta tlat mai a. Tichuan, Philippi 3:14 aṭang chuan Johana 3:16-ah a thlak ta a. Chumi game an khelhdawn a, a bianga a ziah lan avang ringawt chuan Johana 3:16 chu mi maktaduai 90 in internet-ah an zawng hial a ni. Nimahsela, thil mak tak chu he Bible chang a ziah lan aṭanga kum thum hnuah a rawn thleng ta zawk a ni. Kum 2012 a ni a, NFL playoffs khelhdawn chhoh mek niin Tebow-a khelhdawn Denver Broncos leh Pittsburgh Steelers

te nena an game khelhdawn hun a ni a, Tebow chuan game ṭha tak khelin, Broncos chuan hnehna an chang a. Nimahsela, thil dangdai tak mai chu game-ah chuan a thleng a. Chumi game-ah Tim Tebow-a stats chu a dangdai kher mai –

1. Johana 3:16 a ziah lan aṭanga kum 3 na chiah chiah a ni.
2. Game pumpuiah Tebow chuan passing yard 316 a nei.
3. Passing yards complete chu chawhrualin 31.6 chiah chiah a ni.
4. Lehlam pawlin ball an chan hun chu minute 31 leh second 6 ah chiah a ni bawk.
5. An game khelhdawn chu TV-a tihchhuah niin, rating san lai ber chu 31.6 a ni.

He game stats avang hian ESPN tana thuziak ṭhintu Adam Schefter chuan, “Mi tam tak takte an awih loh, an ringhlel fo a, UFO leh thawnthu mak tak takte pawh

awih an awm rualin, awih lo an tam thin. Nimahsela, Denver chaknaa thil thleng hi chu mi zawng zawng pawm theih khawpa mak a ni, a hlauhawm lek lek zawk a ni,” a lo ti hial a ni.

Tebow-a’na Johana 3:16 a bianga a ziah avang ringawt hian mi tam takin Pathian hmangaihna an hriat pah a, chatuana boral turte pawh chhandamna kawng an hmuh pah a ni. Pathian hman theih tura awm chu mahni tana malsawmna leh mi dangte tana malsawmna a nihzia tilang chiangtu pawh a ni. Pathianin khatiang tak khan a hmang dawn tih a hre lawk bik reng reng lova. Nimahsela, hman theih turin a inpe tawp a, tichuan Pathian chuan a hmang ta reng a ni. Kan duh zawng ang chauhva rawngbawl tum lova, Pathian duh zawng anga awm ngam a pawimawhzia te pawh a lang chiang hle a ni.

Tim Tebow-a American Football player tha ber zing a mi, sum leh pai lamah pawh buaina nei loin heti tak maia Pathian a ring tlat leh a rinna puang chhuak ngam nun a tang hian Mizo kristian thalaite pawh hian zir chhuah tur kan nei lian hle. Mahni nun enin Tebow anga ropui leh mi langsar ni lo mah ila, mi hian min chik reng a; kan nun dan, chetziaah te, leh tawngkamah te thleng pawhin mi hian min chik a ni. Chuvang chuan Lal Isua Chanchin Tha hi kan nun dan a tang hian kan puang chhuak thei a ni.

Kristian kan ni tih pawh hriat theih loh khawpa khawvel mite ang maia kan nun ve mai zawngin kan Kristian dan kan en fiah a pawimawh hle ang; Pathian hian min hmang vek duh a, a inpe apiangte hi a hmang mai thin a ni. Chutiang taka kan awm theih nan chuan kan rilrute a thara awmin, Pathian tan i inhlan thar leh ang u ●

25TH PYF BIENNIEL CONFERENCE CUM GOLDEN JUBILEE CELEBRATION

REPORT



Joseph Vanlalhraua, Kanan Branch

Presbyterian Church of India hnuai a Ṭhalai Pawl, Presbyterian Youth Fellowship (PYF) Biennial Conference vawi 25-na leh PYF Golden Jubilee lawmna ni bawk(25th Biennial Conference Cum Golden Jubilee Celebration) chu Central KṬP leh Ṭhuampui Pastor Bial ten, Youth Recreation Centre (YRC)-ah October 2-5, 2025 chhung khan a thleng a. Conference thupui atan hian “The Lord has done great things for us” Sam 126:3 (Lalpa chuan thil ropui takte min tihsak a) tih hman a ni a, Speaker pali, Rev. Lalchawiliana Varte, Principal, PTI Haflong(CHT Synod), Rev. Rosiamliana Tochhawng, Executive Secretary i/c KṬP (Mizoram Synod), Rev. Dr. BL Nongbri, Principal JRTC, Rev. DC Haia, PCI Moderator hlui ten thupui thiam takin an sawi a, Inkhawm apiangin Synod hrang hrang zaipawl ngaihthlak ṭhin a ni bawk.

PYF Biennial Conference

PCI Assembly vawi 21-na April 24-28, 1974, Haflong hmuna neihin Presbyterian Youth Fellowship (PYF) hming leh Inkaihhruaina duan a pawm aṭanga kum khat hnu May 9-11, 1975 khan PYF Biennial Conference hmasa ber chu Jowai, Khasi & Jaintia Hills, KJP Synod-in thlengin hman ṭan a ni a. Kum hnihnaah zel hman chhunzawm niin kumin kum 2025 hian a vawi 25-na leh PYF Golden Jubilee lawmna hman a lo ni ta a ni. PYF Biennial Conference hi Mizoram Synod-in ṭum 10 thleng tawhin, KJP

Synod-in vawi 5, CHT Synod-in vawi 3, Manipur Synod, JSKJP Synod Mihngi leh JSKJP Synod Sepngi ten vawi 2 ṭheuh bakah Biateram Synod-in ṭum 1 a lo thleng tawh bawk a ni.

Unit leh Member dinhmun

PYF hnuai a hian Unit 11, Provisional Unit 1 leh Associate Unit 1, a vaiin Unit 13 a awm mek a ni. Chungte chu:

1. KṬP, Mizoram Synod
- Member : 1,77,548
2. JS KJP Synod Mihngi
- Member : 36,973
3. JS KJP Synod Sepngi
- Member : 91,178

4. PYF, CHT Synod
- Member : 10,771
5. Manipur Presbyterian Youth Fellowship, Manipur Synod
- Member : 3,472
6. Ri Bhoi Presbyterian Synod C.E. Union
- Member : 8,344
7. Kristian Vanglai Pawl, Biateram PC Synod
- Member : 4,166
8. Zou Presbyterian Youth Fellowship
- Member : 2,756
9. Central Tripura Presbyterian Youth Fellowship, Tripura Synod
- Member : 5,631
10. Central Presbyterian Riso Nimso Amei, Karbi Anglong Synod
- Member : 3,518
11. JS KJP Synod Pdeng
- Member : 15,273
12. Central Kristian Khanglai Pawl, Tangphai Provisional Synod (Provisional Unit)
- Member : 5,202
13. Kristo Jubo Sangho (KJS), Barak Valley (Associate Unit)
- Member : 656

PYF Member zawng zawng
- Member : 3,65,488

Biennial Conference chu kan hmang ta

PYF Biennial Conference hi Zirtawpni zan aṅanga hman ṭhin ni mah se, kumin chu PYF

Golden Jubilee kum a nih avangin a lawmna hun atana Programme pawt seiin Ningani zan aṅangin hman ṭan tura ruahman a ni a. October 2 (Ningani) tukṭhuan eikhamaṅanga Palai in report awm ṭanin October 3 thlenga chhinchhiah theih chinah Palai (Delegates)-564 leh Choir Member-346 nen kan vaiin 910 chhinchhiah a ni. Thlengtu lam Central KTP leh Ṭhuampui Pastor Bialte inbuatsaihna a ṭhain a fel fai hle a, Inkhawmpui neihna hmun YRC hmunhmain min zo a, Palaite tan chetvelna a awlsamin, Ṭhuampui Pastor Bial chhunga kohhran chhungkuate mikhual thlen kawnga an inpekna nasa tak avangin inkhawmpui hi tluang takin kan hmang thei a ni. Palai thlen zanah hian Palai lawmna inkhawm hman a nih bakah Golden Jubilee Souvenir tlangzarhna hun hman a ni.

Conference Rorel Inkhawm

October 3 (Zirtawpni) chawhma dar 10:00 aṅangin Rorel Inkhawm Ṭhuampui Venglai Kohhran Biak Inah neih a ni a, PYF Leader Rev. SC Diengngan-an Rorel kaihruaiin PYF Central Committee aṅanga Agenda chhawpchuah 6 leh Report hrang hrang 17 ngaihlak a ni a. Rorel hi chhun dar 12:30 ah zawh fel a ni.

Thurel langsar zualte chu—PYF Budget Policy duan chu pawm a ni a, Policy thar hi 26th Biennial Conference, 2027 Budget ruahmanna siam aṅanga hman ṅan tura pawm a ni. PYF Budget ruahman 2025-26 atan ₹ 10,30,049/- leh 2026-27 atan ₹ 10,82,557/- te pawm a ni a. Budget-a Unit Assessment atana KṚP, Mizoram Synod-in kan tum tur chu 2025-26 ah ₹ 1,45,576/- leh 2026-27 ah ₹ 1,60,134/- a ni.

26th Biennial Conference 30th April - 2nd May, 2027 a hmanna tur Ri Bhoi Synod CE Union, Ri Bhoi Presbyterian Church Synod chu pawm a ni a, Thupui atan “Enlarge your tent” (I puan in hmun chu zauh rawh) Isaia 54:2 chu pawm a ni bawk. Heng bakah hian Unit Conference hmanpui tura PYF aiawh hruaitu kal dan tur chungchang leh PYF Youth Camp 2026 thlengtu tur chungchange chu PYF Central Committee lo ngaihtuah zui atana dah a ni bawk. Pathianni zanah PYF hruaitu 2025 -2027 hlanna hun hman a ni bawk (Hruaitu tharte hi phek 31-na keimahni huangah tar lan a ni. Ed).

Inkhawmpui boruak leh hun hmangtute

Inkhawm boruak a nuamin chanvo neituten an chanvo an

tihlawhtling thei vek a. Inkhawm apianga zaipawl kan ngaitlakte kha a ropuiin zaipawl member tinte inbuatsaihna a ṅha tawk a ni tih a lang Chiang hle. Inkhawm zaihruaitute zai hruai a nungin zai hona boruak ṅha tak kan nei ṅhin a, kha khan kan inkhawm boruak tam zawk a keng hle a ni. PYF Asst. Secretary Nl. F Lallianzuali, CKṚP Comt. Member-in inkhawm zahawm taka an hruaite khan KṚP nih a ti nuam a, PYF Leader kal chhuak tur Rev. SC Diengngan, (JSKJP Synod Sepngi) inthlahna thuchah a sawi leh Secretary Rev. K Laloo, (JSKJP Synod Mihngi) in a tawp zana lawmthu sawina hnukulh ṅeuh a an pete khan PYF hruaitute inpawhna leh inpumkhatna a ti lang Chiang a ni.

PCI Administrative Secretary (i/c PYF) Rev. Dr. B Lalnunzira, kan Mizo pa ngeiin Jubilee Mei an dette kha thil chhinchhiah tlak a va ni em! October 4 (Inrinni) Jubilee lawmna Programme mawlhthe khan mit leh beng a ti tlai hle a ni. Jubilee lawmna programme kaihruaitu PYF Secretary (2025-2027) Mr. Calvin Hrangkhoh, PYF CHT Synod in hnehsawh taka an kaihruaite kha sawi hmaih phal a ni lo. Jubilee Ruai hnam hrang

hrang kalkhawmin kan han kil hote kha a va nuam em!

Jubilee lawmna leh Variety Programme-a KṚP aiawha chanvo neitu, kan zaithiamte khan fak mawlh mawlh an va phu em! khatiang taka an chanvo tihlawhtling tura zan tam tak an inbuatsaihna leh inpekna kha sawi hmaih theih a ni lo. KṚP Leader, Rev. H. Lalawmpuia leh GS, Upa Lalzarmawia ten langsar si lova, a fel lo lai leh tlabal tur venga kil khata min lo uap tlat te, a tawp zan variety programme kaihruaitu Nl. Agnes Lalrinzuali, Asst. Coordinator, KṚP-in hneh taka chanvo a rawn hlen chhuak leh KṚP hminga chanvo hrang hrang kan hlen chhuah dan zawng zawng khan KṚP nih a ti nuam veng veng a ni.

Thlengtu Inbuatsaihna

25th Biennial Conference hi JSKJP Synod Mihngi lam thleng tura ruahman tawh chu, rokawlhna an neih avangin KṚP Mizoram Synod tlawmngaia thleng tura ngen a ni a, inbuatsaihna chawpchilh taka kalpui a ni. Mizoram Synod aṭangin cheng nuaih 37 hemi pual hian hmuh a ni a, Organising Committee Rev. Lalremliana, Ṛhuampui Bialtu Pastor kaihruaina hnuaiah Sub-

Committee 11-a inṭhenin hun chep tak karah theihtawp chhuaha an inbuatsaihna zarah inkhawmpui hlawhtling tak kan thleng thei a ni. YRC hmunhma duh anga la zawh fel fai a ni lo chungin Palaite tana harsatna awm khawp thil awm lovin ruahmanna siam a ni a, YRC tih changtlunna kawngah KṚP ten hmabak kan la nei a ni tih a lang thar a, hei hi KṚP tan chauh ni loin India rama Presbyterian Ṛhalai rual tan a ni tel a ni tih kan hriat thar a ṭul hle a ni.

PYF-a KṚP dinhmun

India ram Presbyterian kohhran hnuaia Ṛhalaite intawh khawmna lian ber thleng tur hian thil tam tak buatsaih ngai leh senso ngaite a tam chho ve zel a. Synod danga kan unaute zingah rawngbawlna kawnga insawh ngheh nante leh ṭawng chi hrang avangten Synod thar a piang zel a, hei hian member dihmun leh sum dinhmunah te nghawng a nei ṭhin. Synod lian deuh lo tan chuan Biennial Conference emaw PYF Youth Camp thlengtu nihte hi phurrit a tlin palh theih avangin Synod lian leh member tam zawk KṚP-te hian neitu chan chang a, PYF-a a khaitu dinhmun kan nih thiam zel hi a ṭul dawn niin a lang ●



**ṬHALAI PROGRAMME
RUAHMAN DAN
(SOURCE : KṬP HANDBOOK)**

- **Lemchan:** Inbiakna (dialogue) te, lemchan tawi te, lemchan sei te, zaizira chan te, rimawi nêna chan (musical drama) te hi inbuatsaih thei an awm chuan a ṭhain ṭhalaite zînga thusawina ṭha tak a tling thei. Inbuatsaih erawh a hautak deuh thei.
- **Silent Programme:** Hei hi thil dang vak a ni lo va, “Hriat lâwk loh programme” tihna tluk a ni. Programme Secretary emaw, hun ruattute chauhin emaw hun hmangtute a hria ang a, hun hmangtu tûrte chu a hma chiaha hun hmangtu chauh a hrih ang a. Chairman pawhin Bible chhiar leh ṭawngṭai emawa inkhâwm hruaina a hman zawhah mipui ṭhutna lamah a kal ngêl ang a, a dawt leha mi tûr pawh a hunah a lo chhuak ve leh ang. A tâwpah Chairman-in hun a khâr leh ang. A hma chiaha hun hmangtu aṭangin inkhâwm tihtâwp hun a ni tih a hre thiam ve mai ang. Secretary tih loh chuan tuin nge hun rawn hmang leh dawn tih an hriat lawk loh avangin tu takin hun hmang leh ang maw tiin a tâwp kan thleng ṭhak a. Mut chhuah leh nin hman a ni lo va, a ṭha danglam viau. Inkhawm ṭan hmain Secretary-in item nei thei lo tûrte an awm chuan a dawt chiaha mi tûr a hrih lawk erawh a ngai a; chuti lo chuan, a buai nuaih thei a ni.
- **Zawhna leh chhânna:** Ruahman dân hrang hrang a awm thei ang. Thalaite zîngah zawhna lo khawn

khâwm lawk emaw zawhna bâwm (question box) hûn a, chuta zawhna awmte a chhâng thiam deuh tûr inruata chhânna hun siam emaw pawh a ãngkai thei. Tin, hruaituten member-te mamawh leh hriat atâna ãl leh pawimawh an tihte enin zawhna siam theih a ni bawk a, a chhâng tûr pawh Branch hruaitu O/B te emaw, kohhran aiawh emawte hman ni se a bengvârthlâk leh zual ãin.

- **Râwlthar/ tleirâwl pual inkhâwm:** Tleirâwl leh rawthar deuh te pual bîk siama inkhâwm hi Branch lian deuhah chuan a ãlin a ãngkai thei hle. Group zai leh special item nei tûr te chu tleirâwl rualte ni thei vek sela a ãha. KÏP-a seng luhna remchâng leh an tângnêl hma nâna ãha tak a nih

avângin huaihawt thiam chuan a hlâwk thei hle. Tin, an ngaihsân zâwng tak mi bik sawma zirtîr nei thusawi pawh zeh tel a ãha hle.

- **Mual inkhawm (Open Air Service / Street Preaching):** Inkhawmpuia Mual Inkhâwm urhsûn tak ang hi mitthla tura ni lo va, ãhalai inkhâwm boruak nuam tak, chhim ve phâk lo kan ãhalai puite hriat atân programme siamsaknaah ngai ila. Mahni kohhran huam chhûngah emaw, khawpui leh thingtlâng lam, khaw lian deuhah emaw chuan bazar hmun lûn lai deuhah te programme siam theih a ni a. Rimawi leh zai thiam deuh te nêna inbuatsaih a ãha. Inbuatsaih dân azirin kalpui a ãhain a ãha lo thei. Khaw awm dân thlir lâwk erawh a ãl thei ang ●

Thupui : “Inpumpekna”

Chang thlan : Rom 12:1-2
“Pathian khawngaihna avang hian in nun Pathian tan in inpumpek tur a ni”

Thuhmahruai: Rom lehkhathawnah Paulan mihringte chhandamna chungchang a sawi fiah a, mi hring zawng zawng suala an tluk thu leh chhandam ngai vek an nih thute a sawi hnuah, Isua Krista hmangin Pathianin a khawngaihna vang chauhvin min chhandam a ni tihte a sawi a. Chutia Pathian khawngaihnaa chhandam kan nih avang chuan ama tan kan inpe ve tur a ni tih a sawi zui a. Thuthlung Hlui sakhuaah chuan mi sual ngaihdamna turin ran an talh a, chumi hmang chuan an inthawi a. Tunah Lal Isuan inthawina chu min thawhsak thung tawh a, keimahni hi a hman tlak, a hnen ngei a inpe ve tur kan nih thu a zirtir a ni.

1. Inpumpek chu eng nge ni?

Pathianin i nun a neih hi a ni (Inthawina atana inhlannun).

2. Pathian chuan eng ang inhlanna nge a duh?

- (1) Inthawina nung.
- (2) Inthawina thianghlim.
- (3) Inhlanna pawm tlak.

3. Eng vangin nge chutiang inthawina chu i hlan ang?

I rawngbawl dan tur tak a ni (Inthawina pawm tlak, mahni duh thu ngeia inhlanna).


4. Inpumpek dan.

I nun dan Pathianin a thlak danglamna a ni (nun danglam).

- (1) Nun danglamna daltu: Khawvel dan.
- (2) Nun danglamnaa luhna: Rilru tihthar.
- (3) Nun danglamna rah chhuah: Pathian duh zawng a nun.

Tlangkawmna:

Kan sakhuaana hi ran thisena inthawi leh aiawh hmanga sakhuaana a ni tawh lo va. Mahni ngei, hman tlak ni tura kan inpek vena tur a ni tawh zawk. Chuvangin, Pathian thuin kan awm dan tur a sawi ang hian sakhaw mi-na nunpui ila. Khawvela Pathian duh zawng tilangtu leh mi dangte pawhin an tihlanna tura zirtirtu ni turin mahni ngei, Pathian tana hman tlak ni turin i inhlannun ve ang u ●



HRINGLANG TLÁNG

TLO

National Geographic-in a sawi dânin scientist-te chuan khawvêla thing upa leh dam rei ber hmu chhuak niin an inhria a. Norway spruce (far thing) chi khat Europe rama “Christmas Tree” an tih mai thin a ni. Hêng thing chi (conifer) hi kum 2004-ah khan Sweden rama tlâng pakhatan an hmu chhuak a. Thing upa ber ni mai lovin dam rei ber a nih an ring a ni. Thing upa leh dam rei dangte ang lo takin thing upat hmêl ang pawhin an lang lo va, feet 13 a sâng chauhte an ni a. An dam rei chhan chu a zung inkaih dânin a zir vâng niin an sawi. Scientist-te chuan kum 9550 laia upate niin an ring a. A zung pakhat a thih chuan a dang a bulah chuan a rawn chawr nghâl zêl thîn.

Ringtute hi kan tlonatûr leh kan nghehna tûr chu kan zung nghet taka Bible a kaih tlat a ni. A awmzia chu Bible hi rin tûr a ni a, zawm tûr a ni. Tawngtaiin Lalpa ko ila, harsatna eng pawh tawk ila, Ani nen chuan hneh theih loh a awm lova, Lalpa kianga kan thlen loh thin avang zawk hian kan natna leh harsatnate hian min lo hneh thin zawk a ni. Kan rinna a chak loh châng pawhin tawngtai thuai mai ila Lalpan min tanpui thîn tih thlarau mi chuan a hre reng thîn. Heng nun hi Kristian Thalaite hian kan nei lo chu a ni lova, kan kalsan thui tawh mah mah em aw tih theih a ni a, keimahni chaknate, kan finna leh remhriatna te hi Pathian aia rin mai awl tak a ni a, heng a nih chuan Kristian Thalai rinna kawnga chhel leh tlo kan ni thei ngai dawn lova. Lalpaah zung nghet tak kaih tlat a, a hun taka Lalpa hnenatlu lut leh Amaha innghat tlat mi kan nih chuan kan tlo hle dawn a ni.

Jer. 17:8 Tui kianga thingphun, lui kama zung kai, khaw lum lo thleng pawh hlau lo, a hnahte hring reng si; khawkhen kum pawisa lo, rah chhuah thulh chuang si lo ang hi a ni ang ●



KANTU SESIH BRANCH

Kum 60-na hmang mek, Sesi Branch KṬP hi March 5, 1965 khan din a ni a, kumin 2025 hi an Branch kum 60 tlinna (Diamond Jubilee) niin April 2-4 chhung khan an lawm ve nghe nghe a ni. Tunah hian Khuangleng Pastor Bial chhungah an awm mek a, member mipa - 165 leh hmeichhia - 93 an vaiin 258 awm mekin Kristian Ṭhalai copy 60 an la mek a ni. Kum 2023 khan Sesi Branch aṭangin Sesi Dinthar Branch an lo indang ve tawh bawk.

Kum 2025 hian Group thumah an inṭhen a, Branch hnuaiah Sub - Committee hrang hrang - Evangelical Cell, Reception & Ushering, Decoration, Refreshment, Programme, Music, Light & Sound, Sports te din a ni. Kum 1999 aṭang khan Branch chanchinbu “Ṭhalai Aw” tichhuakin Pathianni tuk apiangin an sem chhuak ṭhin a ni bawk.

Kumin hian Branch kumpuan atan “Inpekna” (Tita 2:14) an nei a, hei hi KṬP inkhawmah zir honate neih a ni bawk. Thawḥṭanni zan inkhawm hi Sermon, thupui zir leh Evangelical Cell hmalaknain

inkhawm ban apiangin ṭawngṭai rualna neih ṭhin a ni bawk. Tin, Pathianni chawhnu Inkhawm ban apiangin ṭawngṭai inkhawm neih ṭhin a ni.

Branch sum hmuhna tlangpuite chu Cubic lung lak, slap chhun, group budget, faith promise, thawhlawm, lawmbawm leh lo neihte a ni. Kumin 2025 hian Missionary 6 an chawm mek bawk.

KṬP member boral an awminpawisa a ral ṭhin a ni a, Biak In hawnga inneite chu lawmpuina thuziak, Kristian hla bu bakah wedding bulletin siamsak ṭhin an ni bawk ●



- September 15, 2025 (Thawhtanni) khan NI. Malsawmzuali, Missionary Karbi Anglong hriatreng nan a nu Pi Vanlalhluni, Aizawl Venglaiin tawngtaina in te sakna tur a pe a, a lawmawm hle.
- September 27, 2025 (Inrinni) khan Zemabawk East Branch KTP-te PYF Biennial Conference inbuatsaihna atan YRC hmunhma tifaiin an hnatlang.
- September 29, 2025 (Thawhtanni) zanah Zotlang, Champhai Branch KṚP Chanchinbu Emmanuel Silver Jubilee lawmna hmanpuiin programme Tv. P.C. Lalthanmawia, Committee Member, CKṚP (Editor, Kristian Ṭhalai) leh T. Upa Lalremsiama Khiangte, Committee Member, CKṚP (Jt. Editor, Kristian Ṭhalai) te an kal a. Tv PC Lalthanmawian ‘Souvenir’ tlangzarhin fellowship-ah thu a sawi a, T. Upa Lalremsiama Khiangtein ‘Monument’ a hawng.
- Presbyterian Youth Fellowship (PYF) 25th Biennial Conference cum Golden Jubilee Celebration chu October 2-5, 2025 chhungin YRC-ah neih a ni. Pathianni zanah kum 2025-2027 hruaitu hlanna hun hman a ni a, hruaitu tharte chu:
 - Leader : Rev. Primingson Millick,
Karbi Anglong Synod, (PCI Gen. Assembly ruat)
 - A/ Leader : Rev. Allen Roy Suchiang
JSKJP Synod Mihngi
 - Secretary : Mr. Calvin Hrangkhoh, PYF CHT Synod
 - A/ Secretary : Mr. Rochhingpuia, KṚP, Mizoram Synod
 - Treasurer : Ms. Phibasiewdor Makdoh
Ri Bhoi PC Synod CE Union.
 KṚP, Mizoram Synod (CKṚP) aṭangin Pu Nichoilas Lalbiakzuala chu Committee Member-ah leh Pu Lalduhawma Chhangte chu Editorial Board Member-ah ruat an ni bawk.
- October 7, 2024 (Thawhlehi) zan khan Dawrpui Vengthar West Kohhran Hall-ah 2026 KṚP General Conference Concert-a chanvo neitute inhmuh khawmna hun neih a ni ●

CENTRAL KṚP COMMITTEE : 2024 – 2026**OFFICE BEARERS**

Leader	: Rev. H. Lalawmpuia	: 8974981243
Asst. Leader	: Pu Lalruatfela	: 9774611124
Gen. Secretary	: Upa Lalzarmawia	: 9436370178
Asst. Secretary	: Pu C. Lalkhawngaiha	: 9774638471
Treasurer	: T. Upa Rinsailova Sailo	: 9862327187
Fin. Secretary	: Pu F. Lalremruata	: 9436362544

COMMITTEE MEMBERS

1.	Pu P.C. Lalthanmawia	: 8014697370
2.	Pu C. Hmingthanzauva	: 9436198787
3.	Upa T.C. Lalremsiama	: 9612777977
4.	Pu Rossi Lalawmawma	: 9862145940
5.	Ni. F. Lallianzuali	: 9774764394
6.	Upa Lalnthanga	: 9362216851
7.	Pu Lalrambuatsaiha	: 9862325409
8.	Pu K. Vanlalremruata	: 9774636228
9.	Pu H. Zosangliana	: 9862717107
10.	Pu T.C. Lalhruaitluanga	: 8014160867
11.	T. Upa David Lalfakawma	: 9089529183
12.	Tv. Lalrinsanga Varte	: 7005671202
13.	Upa C. Malsawmtluanga	: 9862366810
14.	Pu David Lalruatfela	: 9862417766
15.	Pu Nicholas Lalbiakzuala	: 7005426480
16.	Pu Lalruatpuia	: 9612307730
17.	Pu Lalduhawma Chhangte	: 8974318732
18.	Pu Rochhingpuia	: 8794210155
19.	T. Upa Lalremsiama Khiangte	: 9862311678
20.	Tv. Vanlalremliana	: 8257881767
21.	Upa Lalbiakfela	: 8414962935
22.	Ni. Agnes Lalrinzuali (Asst. Coordinator)	: 8787480280

EX-OFFICIO MEMBERS

Rev. R.C. Lalnghakliana	: Synod Moderator
Upa Vanlalsawma Siakeng	: Synod Secretary (Sr.)
Rev. Dr. Rosiamliana Tochwang	: Executive Secretary i/c, KṚP

MISSIONARY TRAINING COLLEGE ADMISSION

Missionary Training College (MTC), Mission Vengthlangah Bachelor of Missiology (B.Miss) zir duh tan dil theih a ni leh ta. Dilna Form leh Prospectus hi ` 50/- in office hun chhungin MTC Office-ah ni 1 October, 2025 a`angin lak chhuah teih a ni e. Application Form hi MTC website:<https://www.mtc.edu.in>-ah download theih a ni baw k ang.

Dil thei chin	: CI-XII pass chin
Dilna theh luh hun	: Ni 27.2.2026
Entrance Test	: Ni 10.3.2026@MTC
Interview	: Ni 12.3.2026

– Rev. Dr. Lalramchhana, Principal (9612164982)



KANTU : SESIH BRANCH



STREET MINISTRY



Postal Regn. no. MZR/ 116/ 2024-2026
RNI No. MIZMIZ/2009/29074

KRISTIAN THALAI MAN PEKNA
 Account hming : KTP
 Account No. : 30045422892
 Bank : SBI, Mission Veng Branch
 IFSC Code : SBIN0007058
 Account-a Chanchinbu man petuten Receipt Screenshot
 Whatsapp No. 8787480280-ah thawn zel tur a ni e.



PYF 25th Biennial Conference Cum Golden Jubilee Hlimthla



Printed and Published by Upa Lazarmawia, Synod Office, Mission Veng on behalf of Christian Youth Fellowship Edited by PC Lalthanmawia and printed at Synod Press, Mission Veng, Aizawl, Mizoram. Copies - 45,000